



Broj predmeta: 02-000049/20
Broj akta: 01.1-1141SM-217/20
Datum, 8. 5. 2020. godine
Mjesto, Brčko

Na osnovu člana 16. i člana 17. Zakona o Vladi Brčko distrikta Bosne i Hercegovine („Službeni glasnik Brčko distrikta BiH“, broj: 22/18 – prečišćeni tekst, 49/18, 8/19, 10/19 i 32/19) i Odluke o imenovanju Štaba za zaštitu i spašavanje Brčko distrikta BiH, broj predmeta: 02-000049/20, broj akta: 01.11-0566LO-006/20 od 13. 3. 2020. godine, broj akta: 01.11-0566LO-012/20 od 13. 3. 2020. godine i broj akta: 01.11-0566LO-020/20 od 16. 3. 2020. godine, a u skladu s članom 18. tačkom o), članom 19. tačkom a), članovima 35. i 37. stavom (1) Zakona o zaštiti i spašavanju ljudi i materijalnih dobara od prirodnih i drugih nesreća u Brčko distriktu Bosne i Hercegovine („Službeni glasnik Brčko distrikta BiH“, broj: 29/16 i 33/16), Odlukom o proglašenju stanja prirodne nesreće zbog COVID-19 (korona virus), broj predmeta: 43-000096/20, broj akta: 01.1-1141SM-001/20 od 13. 3. 2020. godine, u vezi s Odlukom o proglašenju ugroženosti stanovnika Brčko distrikta BiH od epidemije zarazne bolesti – korona virusa (COVID-19), broj predmeta: 02-000049/20, broj akta: 01.11-0566LO-001/20 od 11. 3. 2020. godine i broj akta: 01.11-0566LO-003/20 od 12. 3. 2020. godine, članovima 5. i 6. Poslovnika o načinu rada i rukovođenju Štabom za zaštitu i spašavanje Brčko distrikta BiH, broj predmeta: 02-000057/20, broj akta: 01.11-0566LO-004/20 od 20. 3. 2020. godine i broj akta: 01.11-1161DS-010/20 od 23. 4. 2020. godine, na prijedlog Odjeljenja za zdravstvo i ostale usluge od 8. 5. 2020. godine, nakon održane telefonske sjednice Štaba, komandant Štaba, gradonačelnik Brčko distrikta BiH dana 8. 5. 2020. godine i z d a j e

N A R E D B U
O EPIDEMIOLOŠKIM PREPORUKAMA ZA
RAD TERETANA I FITNES KLUBOVA U VEZI S PREVENCIJOM COVID-19

Član 1.

Ovom naredbom donose se epidemiološke preporuke u svrhu zaštite korisnika usluga i zaposlenih u teretanama i fitnes klubovima.

Član 2.

Imajući u vidu put prenošenja korona virusa i činjenicu da se prilikom forsiranih sportskih aktivnosti u većoj mjeri u okruženje oslobađaju sekreti i čestice koje potiču iz respiratornog trakta, s kože i dr. organizacija rada teretana i fitnes klubova se mora provesti na način da se na najmanju moguću mjeru smanji mogućnost izlaganja korisnika i zaposlenih eventualno prisutnom uzročniku COVID-19 (posebno značajno zbog postojanja slučajeva asimptomatskog obolijevanja).

U tom pogledu se treba pridržavati sljedećih mjera:

1. Prije puštanja u rad, napraviti plan rada u pogledu organizacije funkcionisanja objekata u uslovima primjene neophodnih mjera zaštite.
2. Osigurati potrebnu količinu propisane lične zaštitne opreme i dezinfekcionih sredstava za zaposlene i korisnike.

3. Na vidnom mjestu istaknuti pravila ponašanja i uslove korištenja usluga teretana i fitnes klubova u vrijeme epidemije korona virusa. O ovim pravilima obavijestiti svakog korisnika prilikom ulaska u teretanu i fitnes klub, kao i elektronskim putem ili putem telefona prije najavljenog dolaska.
4. Korisnici usluga moraju unaprijed zakazati telefonom, mobilnim telefonom ili elektronskom poštom termin za korištenje usluga teretana i fitnes klubova, kojom prilikom se obavještavaju o uslovima korištenja.
5. Na ulazu u klub postaviti dezobarijeru.
6. Prilikom ulaska zaposlenih i korisnika obaviti dezinfekciju ruku nekim od preporučenih dezinfekcionih sredstava (poželjno 70% alkohol) putem dozera ili pumpice s raspršivačem (opciono suha dezinfekcija gelom).
7. Poželjno je posjedovanje beskontaktnog toplomjera kojim bi se svakom korisniku i zaposlenom prilikom ulaska izmjerila tjelesna temperatura.
8. Broj korisnika koji borave u isto vrijeme u teretanama i fitnes klubovima, kao i uslovi i način korištenja rekvizita i programa moraju biti kontrolisani od strane ovlaštenog lica teretane i fitnes kluba, tako da se u potpunosti ispoštuju ove kao i druge važeće preporuke zdravstvenih službi s ciljem prevencije širenja COVID-19.
9. Angažovati licencirane instruktore koji će pored savjeta korisnicima vezano za provođenje odgovarajućih vježbi, koordinirati angažovanje i raspored korisnika unutar teretana i fitnes klubova i insistirati na provođenju navedenih mjera prevencije.
10. U ovoj fazi rada teretana i fitnes klubova orijentisati se na program individualnog vježbanja uz poštovanje definisanih mjera prevencije. Na otvorenom prostoru moguće je organizovati grupne vježbe u kojima nema direktnog kontakta između učesnika i uz poštovanje socijalne distance od minimalno 2 metra.
11. Rad teretana i fitnes klubova organizovati tako da se korisnici primaju uz prethodno zakazivanje u određene termine **po grupama**, prema prethodno definisanom dozvoljenom broju korisnika u skladu s obavezom poštovanja fizičkog rastojanja između sprava i korisnika (socijalna distanca), kao i poštovanja drugih navedenih uslova za rad. Dužinu boravka pojedinih grupa prilagoditi vrsti i sadržaju aktivnosti, kao i potrebi obavljanja postupka čišćenja, pranja i dezinfekcije svih rekvizita, opreme i prostorija posle svake grupe korisnika, a prije ulaska naredne. Naprimjer, ukoliko se predviđa trajanje vježbi od 1,5 sata, narednih pola sata po izlasku svih korisnika provesti postupak provjetravanja, čišćenja, pranja i dezinfekcije.
12. Raspored opreme, sprava i drugih rekvizita za vježbanje, odnosno organizacija aktivnosti mora biti takva da u svakom momentu između korisnika bude zadovoljena preporučena socijalna distanca (fizička udaljenost od najmanje 2 metra, a po mogućnosti i više).
13. Sprave za vježbanje i raspored korisnika organizovati tako da prilikom forsiranog disanja korisnici nisu okrenuti jedni ka drugima.
14. Potrebno je da korisnici ponesu sa sobom ličnu zaštitnu opremu (maske i rukavice) u većem broju (za zamjenu u slučaju ovlaživanja, oštećenja i sl.), kao i sredstva za dezinfekciju ruku, u protivnom isto im mora osigurati uprava teretana i fitnes klubova.
15. Korisnici usluga moraju koristiti vlastitu sportsku i opremu za održavanje higijene (peškire, preobuku i dr.), kao i druge lične predmete koji se ne smiju međusobno razmjenjivati (boce sa sredstvima za rehidraciju, čaše i dr.).
16. Korištenje zajedničkih, pomoćnih prostorija, kao što su svlačionice, tuš kabine i sl. moguće je samo ukoliko postoji mogućnost da se nakon svakog korištenja izvrši dezinfekcija tih prostorija. Sanitarne prostorije (toaletne i prostor za pranje ruku) više puta u toku dana dezinfikovati.
17. Sve vrijeme rada teretana i fitnes klubova omogućiti prirodno provjetravanje prostorija, a po izlasku svake grupe forsirano provjetravanje, otvaranjem svih prozora i vrata. Ne koristiti vještačko ventiliranje ukoliko je u pitanju split sistem ventilacije (sistem u kojem zrak cirkuliše unutar prostorije prolaskom kroz unutrašnju jedinicu klima-uređaja bez razmjene istog s vanjskim svježim zrakom).

18. Oprema, sprave i rekviziti za vježbanje se moraju dezinfikovati više puta u toku radnog vremena. Preporučljivo je da se korisnicima osigura dezinfekciono sredstvo u vidu pumpice s raspršivačem kojim će oni dezinfikovati opremu, sprave i rekvizite prije svakog korištenja. Osigurati ubruse za jednokratnu upotrebu za brisanje vlažnih površina uz naknadno prskanje dezinfekcionim sredstvom.
19. Cijeli prostor teretana i fitness klubova, sa svim pratećim prostorijama, mora svakodnevno biti detaljno očišćen i dezinfikovano nakon završetka rada.
20. U slučaju sumnje da neko od zaposlenih ili korisnika ima simptome zarazne bolesti COVID-19 (povišena temperatura, kašalj, kratkoća daha i otežano disanje), odgovorno lice kluba dužno je da bez odlaganja udalji lice iz prostorija kluba, s preporukom da se odmah javi u Dom zdravlja (febrilna ambulanta).
21. Ukoliko se pojavi slučaj iz tačke 20. ovog člana, odmah obustaviti rad i provesti mjeru detaljne dezinfekcije prostora teretane i fitness kluba i svih pratećih prostorija. S radom nastaviti narednog dana nakon dezinfekcije. Uzeti podatke osobe koja je tokom boravka u teretani i fitness klubu ispoljila znake respiratorne infekcije ili povišene temperature i pratiti instrukcije nadležnih zdravstvenih službi o daljnjem postupanju u slučaju registrovanja pozitivnog nalaza na testu za virus SARS-COV-2 (koronavirus).

Član 3.

Ova naredba stupa na snagu danom donošenja, a objavit će se u „Službenom glasniku Brčko distrikta BiH“.

DOSTAVITI:

1. Uredu gradonačelnika
2. Zamjeniku gradonačelnika
3. Glavnom koordinatoru Vlade Brčko distrikta BiH
4. Svim odjeljenjima Vlade (12x)
5. Sekretarijatu Vlade (3x)
6. Odjeljenju za zdravstvo i ostale usluge
– Pododjeljenju za javno zdravstvo
7. Uredu za upravljanje javnom imovinom Brčko distrikta BiH
8. Uredu gradonačelnika / Inspektorat
9. Policiji Brčko distrikta BiH
10. Članovima Štaba (34x)
11. Ministarstvu sigurnosti BiH, terenski centar Brčko
- Služba za rad sa strancima, Trg mladih br. 8
12. Ministarstvu sigurnosti BiH – Granična policija BiH
13. Institucijama Brčko distrikta BiH (8x)
14. Crvenom krstu/križu Brčko distrikta BiH
15. Javnim preduzećima, fondovima i Zavodu (7x)
16. „Službenom glasniku Brčko distrikta BiH“
17. Arhivi.

GRADONAČELNIK

Mr. sc. Siniša Milić